

Corona, giuventetgna ed il servetsch militar

MAURO MENSING

Omicron sa numna la nova mutaziun dal virus Covid-19. Quai munta, che nus ans chattain actualmain, sch'ins vul crair a la scienza, en la tschintgavla unda da la pandemia mundiala dal virus «SARS-COV-2». Ina tematica che vegn adina puspè menziunada è la «sanadad psichica» dals giuvenils. Ed in'otra tematica, che pertutga intginas giuvenilas e normalmain tuts giuvenils davent da 18 fin 24 onns è l'obligatori da prestar servetsch militar. Quai n'ha era la pandemia betg midà.

Cumenzà en Svizra ha la pandemia da Covid-19 cun l'emprim «lockdown» il mars 2020. L'Armada svizra ha sin basa da quai era introduci il scumond da congedi. Daco quai? – Per pudair sustegnair cun tutta forza la segirtad tar ils cunfins da la Svizra e per pudair sustegnair il sector da sanadad durant la pandemia. Uschia eran tut ils commembers da las scolas da recruta da l'enviern 2020 per radund dus mais isolads en caserna ni en il servetsch per il sector da sanadad respectivamain per la guardia dals cunfins svizzers.

Durant la scola da recruta da la stad 2020 han ins lura cumenzà a sa preparar per novas undas da pandemia. Perquai vegniv'ins testà regularmain en la scola da recruta ed ins pudeva ir mintga duas, trais u quatter emnas a chassa. En scola da recruta d'enviern 2021 n'hai betg midà bler vi da questa practica. A l'entschatta da la scola da recruta stad 2021 è lura vegnida la gronda speranza: La vaccinaziun encunter Covid-19. Mintga commember da l'Armada svizra ha survegnì la pussaivladad da sa laschar vaccinar encunter Covid-19.

Cun quai è il scumond da congedi vegnì

stritgà ed ins era abel da relaschar bunamain mintg'emna ils schuldads en congedi durant la fin d'emna. Tut ils cas da corona savev'ins tegnair sin in bass nivel d'infezziun. Enfin che la nova mutaziun Omicron è vegnida sin il radar.

Ils «zulprins»



Ils «zulprins», uschia sa numna la rubrica per auturas ed auturs giuvens, ina rubrica che cumpara en collavuraziun da la GiuRu Giuventetgna Rumantscha cun la FMR Fundaziun Medias Rumantschas. La finamira cuminaivla da GiuRu ed FMR è da dar spazi e vusch ad auturas ed auturs giuvens. Ils «zulprins» duain damai far qua u là sbrinzlas!

Dapli infurmaziuns davart la GiuRu sin www.giuru.ch ubain via mail a giuru@giuru.ch.

L'Armada svizra ha directamain introduci puspè il scumond da congedi ed intginas furmaziuns èn vegnidas activadas per sustegnair il sector da sanadad. Tut ha cumenzà danovamain.

Per la giuventetgna èn questas undas da pandemia, ils lockdowns, il «sforz» da vaccinar per pudair ir en sortida, il homeschooling, il de facto scumond da contact, ils clubs averts u serrads etc. in detg stress. Ins discorra qua d'ina isolaziun sociala che po avair per consequenza dapli malsognas psichicas ed in augment d'entradas en psichiatrias. Ins pudess pensar che las medias socialas porschian avunda pussibilitads per pudair surmontar questa situaziun. Ma quai na constat betg. Ina giuvenila, in giuvenil dovra contact fisic cun auters, enconuscents giuvenils per sa sviluppar. Bliers din ch'i na saja betg ina buna idea da midar d'ina «isolaziun sociala» tar in conturn dal tuttafatg nov, sco entrar en servetsch militar. Cler è: entrar en servetsch militar è ina midada radicala. Ins entra en in totalmain nov conturn cun dal tuttafatg differentas persunas. L'entschatta è quai in enorm stress, enfin ch'ins chatta il connex en la gruppa. Anc pli grev vegni, sch'ins sto lura star duas, trais emnas en caserna, senza contact fisic cun famiglia u cun l'amatga. Sco en la pandemia da Covid-19. Sch'ins ha lura chattà il connex en la gruppa, sa mida la perspectiva cumpletamain. Ins ha in legher temps cun novs collegs e collegas. Ed exact quai influenzescha in giuvenil per pudair crescher, pudair vegnir ina persuna creschida.

Quai vul dir: Durant in temp d'isolaziun sociala, durant in temp, nua ch'ins sa senta persul, è l'entrar en servetsch militar ina sauna midada che porscha dapli experientscha, dapli sa-

vida per emplenir il satgados da la vita. Uschia ha la pandemia, cun tuttas vistas negativas era ina vista positiva. Pudair crescher durant la pandemia. Pudair sa sviluppar d'in giuvenil ad in creschì.